

# 海角遺編題詞

殘夫

紙上譚兵計已疏。書生祇合註蟲魚。留將國脈民彝在。寶此叢殘數卷書。

東南文物盡荒丘。烽火漫天肆討摻。收拾寒瓊幽草裏。試看光氣隱神州。

## 民族詩話

醴陵寧調元著

明德既夷。詩道雜亂。黎美周起於番禺。大有起衰救弊之思。其爲詩不軌常律。然縱橫排盪。不可一世。徐巨源至謂萬曆五十年無詩。濫於王李。佻於袁徐。織於鍾譚。乃今獨見美周。讀之如春風駘蕩。夏雲崔嵬。如坐百花。雜聽簫韶。劍客翻動左右。推崇之至於如此。美周字遂球。著有蓮盞閣集。花下歌云。生平不事求神仙。願上東海求仙船。童男童女各三千。教之歌舞及管弦。逍遙行樂二十年。遂令婚配同方田。可得萬人馳九邊。大雪國恥銘燕然。老夫鬚眉圖凌煙。結屋花國臨酒泉。名儒俠客列四筵。等閒詩賦人爭傳。乞得一字十萬錢。歡聞變歌云。鏡破面自圓。誰能破儂面。天地縱反覆。儂亦與歡見。少年行云。年少傳聞十二州。報人讎盡轉多讎。經行不用變姓名。醉臥胡姬賣酒樓。美周少年賦黃牡丹詩。鄭超宗主課拔爲第一。時目之爲黃牡丹狀元。贛州之難。與楊廷麟。萬元吉。彭期生。劉同升。姚奇胤同以身殉。可不謂烈哉。

楊延麟字伯祥。嘗著秋興四律云。北湖菱葉近漁家。煙浦荒荒鴈路斜。濕鳥立沙聞社鼓。野人當戶餽田瓜。月明露上蒲萄蔓。夜靜風生萋蕩花。悵望故園溪外渡。一聲橫笛冷蒹葭。司戶祠前一騎回。邊烽未舉燭書來。漢臣獨有和戎策。楚子誰稱執政材。半壁但愁軍餉乏。三關不覩陣雲開。最憐風雪虛龍塞。換取牙門酒一杯。疆弩將軍七萬營。銀鞍金甲耀東征。市兒果銳輕言戰。上相安危慎用兵。海鳥自啼狼虎嶺。妖星空照鳳皇城。河西百里無消息。又道青山夜火明。漢家歲歲戍居延。新築渾河北斗邊。文學未諳鹽鐵論。公卿誰進度支錢。高城寒聽菰蒲雨。戰骨秋枯首宿田。壯士不聞還易水。至今賓客淚潸然。感世傷時。音節繁苦。誦之惘然。又諸葛武侯祠云。霸氣西南日。嘗聞屢出師。才爲王者佐。學與古人期。柏刺一孤樹。桑移八百枝。中原仍帝魏。遺恨史臣詞。

萬元吉游月巖謁周元公廟詩云中。歲不聞道。泛泛逐萍梗。緬懷先哲型。沉憂不出頰。茲來颯巖月。鬼斧擊天影。尺寶洩素雲。一星射瑤井。物理竟如何。遐跡忽深省。元公昔幽憇。萬慮悉以屏。陰陽動靜初。澄心得妙領。於焉瞻遺廟。百世尙嚴整。冥心無極前。衣靈遍清冷。萬字吉人。江

西人。

彭期生。字觀民。海鹽人。起家進士。歷官江西按察使。分巡嶺北。破城自縊死。著有弱水山人詩集。送秋云。悲秋秋去轉堪悲。枉復登臨賦楚辭。遠壑水殘斜照斂。荒原烟冷朔風吹。天邊白鴈迷消息。月下清砧感別離。蟋蟀似能占物候。寂寥一夜傍床帷。君之死也。守備楊大器潛以其骸。瘞之于萬安縣之百花村。世無知者。後竟爲其同鄉訪得以歸。倘忠義之所感歎。

劉同升。吉水人。崇禎丁丑。以進士第一人及第。福藩立。授左中允。不拜。丙戌撫州失守。遂與楊公延麟。首倡義旅。恢復臨江。唐王聞之。拜爲右詹允。晉兵部侍郎。總理江西軍務。城陷死焉。或謂有宋以來。狀元及第死國事者。未得三人。何稟。文天祥。陳文龍。明得五人。黃觀。曹鼎。劉理順。余煌。其一則同升也。爲科甲中人。可因此一雪積恥矣。由百花溪登玉筍山。古風一首云。朝看山出雲。暮看雲入筍。山行若無溪。恰有青童至。指點絕壁間。仙臺藏勝地。藤枝非易攀。巖齒猶可置。日午聞鷄鳴。巖椒啓金字。出險坡漸平。劃然入境異。連峯涌下界。撲面簪層翠。因過丹竈。屢覽紫微志。白花雨外明。紅果林間墜。晚食供芋魁。晨鑪倒茶櫃。坐久慵下山。脚躡想真奇。

塵網詎得辭。幽興偶然逢。意頗超脫。蘇玉局所謂無蔬筍氣者也。其入峽出峽等詩。時或似之。君字孝則。

姚奇胤著有草玄堂詩集。秋夜云。遙夜苦無寐。起視明月光。涼風天上來。隨月入我堂。披衣步前除。獨立以俟皇。蟪蛄既已鳴。鴻鴈亦來翔。感此時物變。怨彼去日長。生非金石姿。安得恆壽康。憂來不可曠。慷慨吟此章。讀之大有傷生悼世之意。君錢塘人。字有僕。

黃幼玄道周。漳州鎮海衛人。唐王時以大學士奉命督師。旬日間。號召忠義之士。萬有四千。與萬元吉。楊延麟。江西之師相犄角。傾人心思。漢亦毋難一戰而還故鼎也。母何至徽州。兵潰爲婺源令某所誘執。絕粒四十日不死。夫人蔡氏聞之。遺以書云。忠臣有國。毋以內顧爲念。迨臨難時。猶裂袷指血。書數語報家人曰。綱常萬古。節義千秋。天地知我。家人無憂。何其授命之從容也。著有西湖忠烈祠迎神曲云。雷鼓聞兮龍在野。雲披離兮龍血下。龍上天兮星無光。椒糈殮兮蘭不芳。靈之集兮四國。鴻八蹄兮驕九翼。凌滄海兮拍白日。踏徂征兮何不得。悉歸休兮此堂。水周兮中央。寒鷄雞兮蒿蒲。羅八珍兮瓊漿。騁素蚪兮駢文鴛。視靈車兮繁靈馬。

執靈祛兮泪盈。把瓊琬兮灑灑。晝不足兮宜宵。夜維舟兮鏤筵。新夫君兮王正年。靈參差兮無後先。澹眉鬢兮馭青天。靈何爲兮情悃。昔屈正則棲玉笥山。作九歌。至山鬼篇成。四山忽啾啾若啼。此文步武正則。西湖話忠烈。未知對此何如也。

休寧金子駿。崇禎戊辰進士也。在館時。讀書窮晝夜不休。同儕輒目笑之。告病歸里。未幾復奉命補修撰。故事修撰。專授進士第一人及第者。子駿以他官選此。蓋異數也。甲乙之交遭國變。遂從故里舉義旗。分兵扼六嶺。以拒我兵。貴池吳應箕。宣城麻三衡。時亦起兵應之。會迎降御史黃澍入城爲內應。城破遂死之。未死之前日。作書遺長兄云。生死禍福。皆有天命。我等唯順受之而已。不能逃遠。我家爲國事勤勞死者。死得其所。流離散亡。亦流離散亡。得其所。弟日內靜觀之。殊亦不大慘。視死真如歸。可見平日學道得力。今爲郡事未定。不得不忍死在此。毋令內地有慘變。將來我誤郡人。使郡人糜爛。是弟貽誤郡人也。聞兄等前積薪於屋。俟有急即舉火自焚。此學道人弟所欣羨也。與長男書云。爾在家中。不必驚惶。當此國家大變。人民惶亂。不能自保之時。不得其所者多矣。如我三月爲國勤勞。今一旦得正而斃。自不枉我自問六

月來。一身久如浮雲。今無一毫繫念。但念郡事未定。此心實實不安。倘百姓安堵。則我瞑目矣。又謂大丈夫不欲自盡。自盡非大丈夫事。吾國之三公。不可辱於口。此中自有道理。我絲毫不亂云云。子駿自謂學道得力。觀此益信其非謬言也。有遺著一律。送雲莊師至吳門云。斯文未墜地。夫子獨栖遲。論易真傳在。從先與俗移。片雲常自遠。孤鶴去何之。別後時相憶。雲山不可知。子駿名聲。有金太史集。同郡諸生江天一者。少深沉。多智略。子駿既起義。辟為參事。相與計劃一切。迨城破。揮天一去。曰。若有老母在。毋從我死。天一歸拜其母及祖廟。追及之。曰。焉有與人共事而逃其難者乎。行至某所。天一曰。一泓清絕。正足怡人。子駿曰。大丈夫死即死耳。當與天下共見之。天一肅容曰。謹受教。既至江寧。我朝勸其降。天一昂首曰。我為若計。不如速殺我。我不死。必復起義。出通濟門。南向再拜。呼高皇帝者三。然後就刑。亦奇男子哉。

貴池吳次尾。少豪俊。負大志。喜面折人過失。陳同甫一流人也。名雖不登朝籍。而人材之邪正。國事之得失。瞭如指掌。所謂小東林者。實公倡之。會金子駿起義。次尾即號召雄俊為聲援。兵敗死事之日。語行刑者曰。吾死勿去吾冠。將以見先入於地下也。相傳其受命處。血痕至今猶

熊艱有光云。次尾著述甚富。錄其悼吳門文相國一什云。相國信公裔。大庭遭遇同。金閨十五載。灑洌標清風。一朝避爰立。身通道反窮。時方工謠諑。安能久置公。去國懷明聖。憂心日忡忡。黯淡吳閩邑。淒涼綠絳中。斯人不可作。世已摧華嵩。其他練鄉勇諸篇。亦多有楚激越之音。

又有麻三衡者。字孟璠。少注名復社。亦負詩詞名。五律贈錢月聖云。不寐成搔首。蕭然獨寤歌。霜天砧響急。庭樹雨聲多。酒力三更緩。愁心萬緒過。錢郎戀明主。獻賦意如何。春興云。二月新雨歇。春流始到門。葦筠連晝暝。新燕掠波翻。山靜鹿無迹。林香風滿園。中原多轉戰。幾處欲招魂。其他佳句。五言如落日照荒野。亡猿懷故林。魂消分劍日。心折覆巢時。一身去鄉土。雙淚滿滄州。七言如吳兒望歲惟呼雨。楚客憂生盡憶家。夢回塞上雙流淚。家在淮南獨倚樓。萬山茅屋白雲滿。十里勾溪紅葉飛。皆可誦也。金子駿兵起。麻亦為倡義響應者之一人。事敗。為我朝所執。以棄市論。

乙酉大清兵之下金陵也。與金子駿同時分兵據徽者。尚有烏程溫璜。瑣司李徽州。日開國變。恆引佩刀歎曰。此身當付汝。城破。手刃其女及妻。遽自刎死。著有貞石堂集。寄友云。靈隱峯前

手暫携。千章新綠子規啼。眼邊流水春重到。別後停雲思幾迷。俯聽靈珠傳點畫。靜聞藥裏急刀圭。殷勤備付遺方法。荔淡安緣緩杖藜。瑣鳥程相國之弟也。注名復社最。早時流卒不以其兄故而擠斥之。

欽人凌龍翰。嘗大清兵南下。方以監察御史巡按河南。監諸鎮。聞警卽星夜馳入歸德城。誓以死守。道內量道濟之沙。外絕賀蘭之救。師潰。仰藥自裁。不殊。自刎。不殊。遂僭從子潤。生單騎。造我清壘。清帥詰之曰。御史私渡河。復抗大軍何也。曰。以大明之官。歸大明。何云私。職授監軍。恨不得一戰死。何云抗。清帥默然。手金爵侑之酒。曰。吾天性不飲也。贈大帽貂裘革鳥。復擲之於地。斬學道蔡鳳。監軍道吳汝琦於前。以恐怖之曰。吾已辦一死來矣。因自縊死。遺書致我清。有云。願堅守盟好。慎勿南下。否則揚子江頭。凌御史卽錢塘江上伍相國矣。潤生亦從死。其決絕詞云。鞠旅陳師誓大川。時乎不濟悵徒然。沙場偃臥餘長嘯。叱馭青虹問上天。公答詩云。艱難歷盡竟徒然。撒手長歸那問天。自古文山能有幾。不如仗節學平原。

陳子壯字彙生。一字秋濤。南海人也。李成棟踞廣州。集生號召舟師數萬。復沿海諸郡縣。頁十

朱維士率義旅。自上流應之。遂悉兵登岸。圍廣州城數匝。適暴風雨驟至。舟飄飄不得附岸。成棟出鐵騎蹙之於水次。一軍盡溺。集生亦靖節。著雲濛集。春日侍諸父老。乞舟桃花塢云。欲作郊居卽漢西。紅芳十里勝金堤。不知南漢千年死。更入東風幾曲溪。負局客來鷄犬吠。和歌誰伴乳鴛啼。清時羣從多游好。豈是秦人世外迷。永曆三年。賜謚文忠。贈番禺侯。集生沒後。其弟子升。收其遺衆。據花山島。與楊光林。王興號繡花針者。各擁衆數萬。相犄角。成棟反正。始釋兵。入覲授兵科給事中。嗣改禮科右給事中。其詩非乃兄所可及。古體規仿玉臺。五言學太白。時亦瓣香孟襄陽。有中州集。順德薛始亨爲之序。而行諸世。昔昔鹽云。鴛鴦簾外鳥欲棲。玳瑁梁間燕吐泥。月暈圓隨漢東轉。天河傾向汝南鷄。萬方儀態華燈出。一笑橫陳翠帳低。愁見曉鴻征北塞。不知天將定遼西。南中塞下曲云。膠寒竹箭猶揚越。笛散梅花已漢關。小月陣前雲出塞。骨都營外火連山。江邊玉帳樓船渡。馬上金錢御府頒。百尺高樓兩銅柱。漢家何日拓南蠻。遊峽山云。軒轅二帝子。弄笛開禹陽。江岸扁舟客。聞鐘到上方。仙靈今寂闕。雲水空青蒼。欲遣愁心去。猿聲嶺外長。西樵大科峯云。樵峯七十二。秀出一峯尊。策杖觀朝日。浮瀾動海門。孤松

生島外。片雨落山根。吾欲驂鸞去。憑虛望帝關。數詩皆膾炙人口者也。喬生子升之字。

東莞張家玉。字玄子。李成棟陷廣州。玄子與陳子壯等後先起義。我兵奔至。玄子督陣過水次。馬驚墜水死。詩才亢爽。著有遙夜怨軍中遺稿錄別和李定夫云。鴛鴦戲清池。兩兩常相倚。羽翼臨當乖。風波中道起。相對尙難知。何況萬餘里。來親去者疏。毋爲貴君子。子懷抱區區。君諒執高誼。途中感舊云。燈下妖姬月下筵。風流曾泛太湖船。如今萬里神京隔。回首西風憶往年。闔思云。竹林啼鳥遍春暉。何事行人尙未歸。惆悵夜來窗月白。夢魂飛不到金徽。又有七言云。真同喪狗生無賴。縱比流螢死有光。尤足瞻其身世。玄子有弟曰家珍。字瓊子。有寒木樓遺詩。年十六。隨玄子履戎行。騎黃馬。摧鋒陷陣。莫敢撓其銳者。馬死哭之慟。弔以詩云。久失飛黃馬。空餘血戰衣。可憐橫草後。不得裹尸歸。力盡猶追逸。功高幾潰圍。年來生髀肉。夢爾淚頻揮。順德陳邦彥。字會斌。廣州之圍。我清知謀出於公。求其家。獲其妾沈氏。子男二。厚遇之。爲書招降。公判其尾云。妾辱之子殺之。義不顧妻子。兵潰死於難。著有巖野集。南雄道中逢霍階生云。病後無顏色。秋深有遠行。漸於鄉土隔。翻遣故人驚。歸思珠江道。前塗白下城。嶺梅殊未發。貽

贈若爲情。重別葉公士云。大道風斯遠。知音世所稀。他山情獨切。兩地夢俱飛。楚塞丹楓暗。吳門翠岫微。祇憑文賦在。萬里未相違。又絕命詩云。天造兮多艱。臣也江之濱。書生漫談兵。時哉不我與。我后兮何之。我躬兮獨苦。崖山多忠魂。後先昭千古。君子誦其詩而悲之。公死後。一妾及二子和尹。虞尹。皆被禍。仲子馨尹亦死亂軍中。惟恭尹年十七。易服逃出。父執增城。湛珩如於其家爲復壁以匿之。後以詩名。兼工書法。山木蕭蕭風更吹。兩岸風雨至今悲。一聲杜宇啼荒殿。十載愁人拜古祠。海水有門分上下。江山無地限華夷。停舟我亦艱難日。愧向蒼苔讀舊碑。卽其舟泊崖山時作也。故其音獨哀怨焉。其它佳句。五言如離憂在湘水。古色滿衡陽。帆隨南嶽轉。鴈背碧湘飛。七言如桃柳過雨垂空地。瑤瑤乘潮上古城。家山小別吟兼夢。水驛多情浪與風。皆逼真唐人。無愧作者。恭尹字元孝。一字獨漉。德慶王國賓題其集云。四皓歌采芝。夷齊歌采薇。君今一卷詩。忠愛何依依。朋輩皆追老。河山淮落暉。淒涼御琴曲。無淚更沾衣。

松江陳臥子子龍。少出黃道周門。個儻自負之士也。明末詩教衰。子龍出一掃浮習。上追正始。時人比之嵇卮晚翠。良非偶然。著有白雲草廬居。湘真閣諸稿。廬居云。行遜山河改。歸來松

菊荒尚餘三畝宅。無復萬家芳。祈死煩宗祝。始生魏國殤。但依親隴在。含笑此高岡。錢塘東望有感云。清溪東下大江迴。立馬層崖極望哀。曉日四明霞氣重。春潮三浙浪雲開。禹陵風雨思王會。越國山川出霸才。依舊謝公携屐處。紅泉碧樹待人來。晚秋雜興云。太行東出擁神京。古塞秋風右北平。笙鶴已辭滄海使。貂蟬初撤羽林兵。清霜玉沼芙蓉苑。旭日金舖翡翠城。魚鱗時傳宜召急。侍臣通籍在承明。送吳興棹司李桂林云。翡翠巢邊匹馬過。千盤桂嶺鬱嵯峨。南浮離水啼猿滿。北望君山落鴈多。蠻府官閒能作賦。漢廷恩近憶鳴珂。愁心獨繫張平子。欲寄瑯玕奈遠何。邊詞云。八城亦是古遼西。大纛高牙萬馬齊。壯士錦衣行樂地。十年無夢到春閨。哭周立勳云。松柏西陵路。菡萏北里花。春風夜臺路。玉勒向誰家。立勳字勒前。幾社六子之一也。其他警句如左。徒舊宅猶蘭圃。中散荒園尚竹林。九龍移帳春無草。萬馬窺邊夜有霜。九月星河入出塞。一城砧杵客登樓。四塞山河歸漢闕。二陵風雨送秦師。石顯上賓居柳市。竇嬰別業在藍田。皆風格雄麗。不愧古作者。乙酉南都陷。子龍起師。據太湖爲規復中原計。迺一籌未展。駿驄與英雄共逝。遼鶴借城土俱非。亦天實爲之。莫之奈何也。侯方域弔公詩云。長箋奏地

下。端不欺忤曰。後死孰有爲。成敗事皆偶。斷頭何足惜。固其含笑受。萬卷識是字。文士非無守。從來諸輕薄。賴公重不朽。誠哉。從來諸輕薄。賴公重不朽矣。同里徐孚遠。夏允彝。皆少相友善。至是亦先後死國難。

徐孚遠字闇公。崇禎壬午舉人。與臥子彝仲諸君子倡幾社于雲間。其今古文詞。一時風靡海內。有曉入京口詩云。獵獵風梢勁。驚流伏枕閒。晨鐘下巖際。戎鼓列江濱。已辨南城樹。新添北府軍。亂離知未定。淹泊對孤雲。又尋顧野王讀書臺云。入門禾黍動秋風。廢院難支碧藜中。不及平原兄弟宅。尚餘栗主寄花宮。詩不多傳。

夏允彝字彝仲。由進士除長樂知縣。補汝功主事。南都亡。投池水死。公在幾社中。以經義擅長。詩非其專尚也。然弔黃淳耀進士一作。一字一派。誦之淒然。詩云。黃子不偶生。大雅寡諸俗。羽儀乍高羣。結綬匪所欲。黃雲暗蒼梧。北風號大陸。烽火滿吳關。下邑勢彌蹙。緬彼二三子。登陴自躑躅。城郭既已乖。號秦又誰告。處死良獨難。苟生何能淑。吁嗟烈士心。伯仲互相勗。威鳳既在羅。恥與凡禽逐。未知沒者悲。但見存者辱。存沒兩茫茫。思君不可贖。著有幸存錄一卷。

彝仲有子曰完淳。字存古。十五從軍。十七授命。磨盾草檄。雖一時名宿自愧弗如。大哀一賦。尤足步武蘭成。昔終童未聞善賦。汪錡不號能文。求之古人。殆難其匹。著有玉焚集。南冠草。續辛存錄。錄其古近體詩於此。精衛云。惠風蕩芳樹。有鳥鳴中林。尾長羽翼短。銜石隨浮沉。崇山日以高。滄海日以深。既無凌風姿。延頸振哀音。辛苦徒自力。慷慨誰爲心。惜哉志不伸。道遠固難任。滔滔東逝波。勞勞成古今。秋夜感懷云。登樓迷北望。沙草沒寒汀。月湧長江白。雲連大海青。征鴻非故國。橫笛起新亭。無限悲歌意。茫茫帝子靈。送杜于臬歸鄂云。分手金陵道。相逢倍黯然。鶯啼楊柳岸。人在木蘭船。客路三千里。征衣十二年。計程歸夏口。明月兩回圓。卽事詩云。復楚情何極。亡秦氣未平。雄風清角勁。落日大旗明。縞素酬家國。戈船決死生。胡笳千古恨。一片月臨城。戰苦難酬國。仇深敢憶家。一身存漢臘。滿目盡胡沙。落月翻旗影。清霜冷劍花。六軍渾散盡。半夜起悲笳。春興同鏡大作云。上苑東風試早鶯。故宮依舊百花明。江帆入鏡移瓜步。朔馬如雲走石城。金鼓平陵憐霍義。旌旗滄海葬田橫。傷心終夜看牛斗。醉把吳鉤萬里行。池塘楊柳綠陰垂。煙雨飛花滿院悲。三月曉迷吳苑路。萬年春靜禹陵碑。江湖夜夜呼精衛。草樹山

山哭子庭。最是傷情無隱恨。恨猶偏向月中吹。河山風景淚堪揮。江上傷心對夕暉。蜀道盡悲諸葛死。漢家猶望少卿歸。五湖義士蓮花劍。七郡良家柳葉衣。結客少年情不淺。平林裘馬放春園。建業河山萬里遙。煙波天際出金焦。星辰夜隱移南極。江漢春翻鎖北條。羽獵自高京口樹。鶯花不度廣陵潮。琵琶馬上愁胡語。青塚年年恨未消。憶候幾道雲俱見。弟云。春城煙霧曉陰陰。俯仰斜陽弔古今。萬里河山猶故國。九江風雨自同心。欲知真主觀司隸。未見孤兒屬羽林。鶴唳華亭人沒後。河橋一閱淚沾襟。十二月十八立春云。可憐又是鮑陽時。孤客征衫泣路歧。柳木不欣秦正朔。衣冠猶想漢威儀。落梅入夜迎風急。細柳知春遇雨遲。聞道海南多玉氣。扶桑先浴萬年枝。寒食雜作。同錢二不識賦云。朔風廣漠散裘寒。客子飄零行路難。北首可憐秦郡縣。南來無復漢衣冠。昭關去後難亡楚。滄海歸時未報韓。袖裏吳鉤愁獨倚。霜鋒夜月下城中。由丹陽入京云。萬里河山拱舊京。楚囚西去淚如傾。斜風衰柳丹陽郭。細雨孤帆白下城。殘夢忽驚三殿報。新愁翻覺一身輕。從軍未遂平生志。遺恨千秋愧請纓。其就義時尙自賦絕命詩三章。寄母云。孤兒哭無淚。山鬼日爲鄰。古道麻衣客。空堂白髮親。循陔猶有夢。負米竟誰

人忠孝家門事。何須問此身。寄內云。憶昔結褵日。正當撥甲時。門楣齊閭闔。花燭夾旌旗。問寢談忠孝。同袍學唱隨。九原應待汝。珍重腹中兒。又寄荆隱女兒兼武功侯翊云。門閭推江左。孤忠兩性全。十年黃鶴詠。三載蓼莪篇。愧負文姬孝。深爲宅相憐。大仇俱未報。賴爾後生賢。存古學有師承。兼秉父族。自彝仲殉國。雖即以復仇自矢。故其所爲詩文。悲憤之氣。不可遏抑焉。昔趙文口謂讀汪水雲詩而不墮淚者。殆不名人矣。吾子存古詩亦云。

嘉定黃蘊生涪耀。性剛正。於書無所不讀。及第後寄弟詩云。吾延試傳臚。與鼎甲先上殿。人皆嘖嘖稱羨。吾此時嘆息天地間。自有爲數千年一人。數百年一人者。今必不肯爲數千百年之一人。而必欲爲三年之一人。可怪也。其自命不苟如此。當公在某撫軍幕。某邑令彙數百金賂公父。令致書爲左史。公復書云。父生男之身。猶望生男之心。若行一不義。取一非有。男心先死矣。何以養父乎。其不可侵犯如此。有陶菴集。和陶飲酒詩云。朝光入山樓。栖鳥已驚喧。攪糞曝新陽。暖氣無頗偏。仰視天宇清。得我檐前山。山中出岫雲。變滅何時還。我心正惘悵。默與風鈴言。和癸卯歲始春云。舊穀滿場圃。知子良非貧。糟床注春醪。酬汝四體勤。開軒一笑粲。莫適爲

主人。舜牙花乳香。綉縷銀絲新。咄嗟行酒次。童僕皆欣欣。中原有椿鬪。行子勞問津。不能濟時代。甘與農圃鄰。逝辭謝景夷。來就劉遺民。次韻酬別張子石云。百丈牽江一線平。勞君客裏念歸程。即看去住誰能料。可是分離莫漫輕。白鳥背飛星子驛。朱旗遙颺石頭城。船牕日把詩篇坐。香草含風處處生。留張貞白云。瓜廬小結在塘坊。城市偷然即遠郊。谷爲愚公寧避辱。亭因馮子不辭嘲。鳴蜩秋盡猶綠砌。舞燕春深亦認巢。莫愛雲松棲絕壑。山中依舊要誅茅。我兵下蘇州。公遂偕其弟淵耀。通政使侯嗣曾。致諭龔用圓。入嘉定爲城守計。道城破。詣城西僧舍就縊。主僧無等止之曰。公未仕可勿爾也。公曰。城亡與亡。乃儒者分內事。因取筆大書曰。遺臣黃涪耀。于弘光元年七月初四日。自裁於西門僧舍。嗚乎。進不能宣力朝廷。退不能潔身自隱。讀書寡益。學道無成。耿耿不寐。此心而已。異日口氣復靖。中華土庶。再見天日。論其世者。當知予心。書罷顧視其弟淵耀已懸樑矣。遂縊於其側死。

龔用圓字智淵。方城破。抱其兄用廣大慟曰。我祖宗清白自矢。歷三世矣。今日苟且圖存。何面目見祖宗於地下。遂共溺。兩屍浮水面。猶握手不解。其弟用厚。諸生也。初携妻子出避。尋亦自

溺死。智淵著述頗富。惜散佚不傳。湖上遇同年朱子暇云。一見相携話舊遊。湖光汎汎斷橋頭。寒煙迷却西冷路。還向當墟問酒樓。

嘉定侯豫瞻。與黃蘊生同時起義。迨城陷投池水未死。大清兵鈎之出。遂遇害。子玄演。玄演皆從死。弟岐曾。後以坐匿。故給事中陳子龍棄市。豫瞻有送表弟楊維斗解元上公車詩云。赴隨徵書有曠思。仍借計吏謁金門。時危漸覺科名薄。道在還知禮樂尊。老子甲兵今孰仗。嗣宗臧否不輕論。冰霜歲晚孤征夜。撲被應知手綫溫。

玄演字幾道。雜詩云。道喪向千載。百家日浸淫。如彼鏗磨歇。遂纏遺其音。元宰何茫茫。悠悠費追尋。世皆尚彫飾。未敢明此心。微言會將絕。太息空撫襟。

玄潔字雲俱。癸未九日寓崑山詩云。肺病經三月。秋深寄古祠。近山寒更早。多雨菊翻遲。漸減文章樂。能忘寇盜悲。今朝無客至。令節竟誰知。示智含云。天王十五年來事。孤客三千里外人。望關尙留年少哭。哀時偏見異鄉春。坐愁南郡征輸日。行過江黃戰伐塵。直北大荒空草木。春風生事又黃巾。

岐曾字雅瞻。門人私謚曰文節先生。望湖口亭口占云。俯檻卽湖陰。沿流望隔灣。峯開三面色。人雜五方言。簫鼓龍祠鬧。松楸馬脊深。悠然喧寂理。飄泊一觀心。

吳江吳日生。當留都失守。走太湖。與同邑舉人孫兆奎。諸生沈自炳。自朔。武進吳福之。謀舉兵。旬日得千餘人。屯於長白蕩。唐王聞之。授爲僉都御史。總督江南軍務。進兵部尙書。同時魯王在浙。亦遙授爲兵部侍郎。封長興伯。八月。大清兵至。失勝利。父承緒妻沈及女。皆赴水死。自朔自炳。福之。亦相繼抗節死。兆奎被獲。一軍盡殲焉。明年鄉人周瑞復聚衆長白蕩。迎日生入其營。未幾衆復潰。爲邏者所執。被磔於市。有東湖唱和集。東湖雜詩云。百代傷心地。風烟莽不收。江山一弔望。吳越幾春秋。鴻鴈青楓渚。芙蓉白露洲。誰才今寂寞。何處問扁舟。禹跡今何在。蒼茫水國開。山趨天目下。日湧海門來。笠澤橋如帶。淞江水似杯。東南輸輓盡。鴻鴈有餘哀。從軍行云。已分沙場報主恩。身經百戰滿瘡痕。但教死去圖鱗閣。不願生還入玉門。此詩語意一脫前人窠臼。唐人許渾四絕。陳子昂之送魏大從軍。亦自可入。以其皆不屑以朔雲邊月。塞外之慘狀。親戚哭送寫暫時之離情。致墮入魔道。令漢族武士魂。終古不能喚回也。福藩初立時。